

太上洞玄靈寶十師度人妙經

道言 昔龍漢之年 崑崙山西六十萬里海洲之上 有國名鳩耶梨國  
國王號曰盛首羅 領十九小國 地方二十萬里 其土人民 利根  
智慧 易可化度 其王夫人 宿植德本 曉了無上大道 慧解一切  
欲度於王 故來為王妻 奉侍齋戒 飭不近身 為王說法 王意  
達悟 堪任受持 時有神仙真人 名稱蓋世 廣博法典 靡經不綜  
十九小國 謂其廣博 未曾聞斯真要之義 乃以正法助王治國  
其王夫人親自供養 如事父母 為作舍館 壁方百丈 七寶莊嚴  
黃金為棟 珊瑚為柱 白玉為壁 瑠璃為地 瑪瑙為床 水晶為帳  
紫金為鈴 懸垂四角 月光摩尼 環釘四壁 晝夜常明 上妙奇  
玩 以為臥具 甘膳軟滑 以用供養 王與夫人 坦然意解 心大  
歡喜 得未曾有 倍加恭敬 即遣使者 召十九國中諸大臣等 一  
時俱至 王自宣言 卿等知不 我有國師 人中無雙 卿等皆應往  
詣 稽首作禮 咸共請受治國之法 諸大臣等 是時各受王敕 往  
仙人所 咸共作禮 又手當心 長跪白言 我等暗蔽 頑愚斯極  
有何功德 今生尊貴 為王所念 得享斯位

太上洞玄靈寶十師度人妙經

清微藏書閣

仙人答曰 善哉善哉 諦聽諦聽 當為卿等解其要義 卿等前生  
好喜布施 禮事三寶 慈念一切 獲福報生 尊貴豐財 為人所念  
故得斯位 爾時 十九大臣 各自思惟 意解歡喜 白仙人曰  
唯願大師 教我等王治正之法 使國無患 風雨時若 五穀豐登  
人民安樂 恒蒙親曷 國內得濟  
仙人答曰 治正甚易 何謂為易 愛卹孤老 不枉人民 辭無滯訴  
獄無停囚 使役以時 不廢民務 撫民如子 治正如是 國安民  
泰 皆稱讚王之德 妖星隱沒 風雨以時 君禮臣忠 邊境靖嘿  
四夷來王也 國安民寧 有何災患 夫為王者 賞罰之主 所以賞  
者 賞有功 所以罰者 罰有罪 故有功不賞 有罪不罰 何以為  
君 治正苟乖 則君暴虐於上 臣亂於下 四海糜沸 所以彗星夜  
現 風雨不時 人民窮困 蝗蟲暴食 陰陽錯亂 皆由國王諸大  
臣等 橫枉無辜 使役失度 自恃豪貴 傲忽自驕 不憂國政 萬  
民患之 皆思去亂 天神地祇 不復衛護 眾惡來前 如此自害之  
道 喻之天下 有四者名為自害 何者為四  
一者樹繁花果 自折其枝

二者如鐵依格 自毀其形  
三者虬蛇含毒 還自害身  
四者如王無道 自害其國 如影隨形 如響隨聲 天之自然  
是時 諸大臣等 心開意解 前起作禮 辭退而去 爾時 十  
九大臣 各還其國 具向王說正法之治 王大歡喜 各還遣臣 齋  
持珍寶 供養大齋 七日七夜 講說大乘經典 是時  
天尊於大羅天上 端拱于座 遠以道眼 見此十九國王 皆發道心  
即化作仙人 與彼無異 入其館殿 便相勞問 講說無上正真道  
要 無有疲厭 爾時 仙人以威神力 令彼仙人不別識是天尊 是  
時王與夫人 及十九大臣 見二仙人儼然在座 心各念言 此二大  
士 何者是師 誰為弟子 爾時  
天尊知其心念 即化作瑠璃珠一枚 置正掌中 遍見諸臣 普告之  
曰 卿觀此珠 內外明徹 無有障礙 天尊告曰 我觀汝等 猶如  
此珠 亦無障礙  
天尊欲現示神化而已 方便告之曰 現汝道力 於是天尊湧身於虛  
空中 上無所投 下無所依 忽然下地 履地如水 履水如地 還

## 太上洞玄靈寶十師度人妙經

清微藏書閣

其本座 王及夫人 并諸大臣 見此神力 而相與言 此之大師  
神力第一 我昔以來 未曾見此希有之事 爾時  
天尊知其心念 即自變三十二相 八十種好 頂放光明 遍照十方  
暗蔽日月 都不復現 土石諸山 一切草木 皆作金色 譬如劫  
水 滉洋浩汗 是諸萬物 沉溺不現 唯見大水 天尊光明 亦復  
如是 其處幽冥 日月盛光 所不能照 皆悉大明 其中眾生 兩  
得相見 自謂而言 此中云何 忽生汝等 是時  
天尊復現大身 廣大無數 遍滿虛空 間隙無容 忽復身小 細如  
微塵 如是事已 於虛空中 口吐五色妙光 變成寶蓋 獅子蓮花  
之座 白銀為眉 瑪瑙為根 瑠璃為本 紫金為柱 水晶為條 碑  
磔為葉 蠲勝嘉寶 以為其臺 明月寶珠 以為花色 文瓊妙珍  
以為法飾  
天尊現身而坐其上 有十九大王 及十方國土一切人民 皆見天尊  
在虛空中 於七寶蓮花座上 各以衣帔 盛眾名花 尋光而來 散  
天尊上 圍遠三匝 禮敬而坐  
爾時

天尊復於虛空中 化作百千寶帳 下有百千獅子之座 一一座上  
有百千天尊 一一天尊 各有百千仙童玉女 而侍衛之 復有千萬  
諸無量之眾 從地湧出 各以諸天妙花 散天尊上 所散之花 各  
從十方來至 繽紛而下 如天降雪 諸天妓樂 於虛空中一時俱作  
復有諸天魔王 從諸兵士 中有一人 人身獸頭 或作龍蛇 種  
種異形 尋光而來 詣天尊所 皆前作禮 卻坐一面 復有諸大鬼  
王 夜叉羅剎 諸農人鬼 無量之眾 皆同共集 復有異類妙音之  
鳥 其聲八種 圍遶天尊 吐其雅音 復有四大龍王 東海龍王  
青衣青冠 青幢青蓋 將從青者無鞅之眾 南海龍王 赤衣赤冠  
赤幢赤蓋 將從赤者無鞅之眾 西海龍王 白衣白冠 白幢白蓋  
將從白者無鞅之眾 北海龍王 黑衣黑冠 黑幢黑蓋 將從黑者無  
鞅之眾 皆尋光而來 俱到天尊所 圍遶三匝 禮敬而坐

爾時

天尊見是無量之眾 皆悉以集 既化身而現無量百千天尊 從頂而  
來俱入 忽不復見 而以一音聲 為是大眾 諸天人民 及鬼神等  
說大乘經典 於是大眾天龍八部 各隨其類 各解天尊一音之語

## 太上洞玄靈寶十師度人妙經

清微藏書閣

自相謂言 天尊今日為說正法深義 開喻多矣 爾時 仙人見是  
神化 不可思議 復有天尊無量百千 皆在七寶獅子座上 今從頂  
入 都不復見 而白天尊言 向見百千諸無量天尊 并諸侍者 今  
皆隱沒 得無疑乎 眾魔欲來惱我

爾時

天尊告仙人及諸大眾曰 譬如靜夜置百盆水 其中各有一月 百盆  
百月 天上有百月不 仙人白言 無也 天尊曰 今我此身 亦復  
如是 如天上月應百盆水 有何怪哉 此日說是語時 三百六十人  
皆得下仙 三萬天人皆得上仙 十九大王悉得神仙 爾時 大王心  
各念言 如是大眾 相謂我等 皆須香湯澡浴 爾時  
天尊知其心念 即作淨池 黃金為底 白銀為沙 其池水中清淨薰  
香 不冷不熱 調和冷暖 悅可眾心 爾時 浴竟 欲令水沒足  
水即沒足 欲令水至膝 水即至膝 欲令水至腰 水即至腰 欲令  
水灌身 水即灌身 爾時 入池者 皆發無上正真大道之心 眾病  
除愈 其池底遍生眾妙之花 若寶之花 千葉蓮花 諸天雜花 紛  
馥香熏八種 世俗人民聞香即得天仙 又得無上道 無上道者 不

生不死 不滅不壞 不變不易 不來不去 非實非空 一不離於空  
凝湛淡泊 是名無上大道 說是語時 十方天人得無上道 三十  
七仙人皆得六通道果 爾時 大王心口自言 中食時至 如是無量  
大眾 食不可遍 爾時  
天尊知其心念 即告王曰 但非一盆飯 爾時  
天尊以威神力演一盆飯 令是無量大眾 皆得飽足 食餘飯如崑崙  
山 爾時  
天尊復以神力取崑崙山 敬置掌中 騰上大羅天 爾時 大眾莫不  
皆見 以崑崙山擎右掌中 弗起于座 遍示十方 猶如壯士屈伸臂  
肘 還置本處 不令虧損 是諸大眾聞法要者 其懈怠者 其樂聞  
者 即演七日以為一劫 令諸聽者謂之為食時 爾時 十九大王  
見是威神功德 成就第一 大施法事 度諸無量眾生 是事何師  
學誰大乘 願示我等本師之處  
天尊告曰 善哉善哉 諦聽諦聽 我有十師 近在不遠 十九王起  
前進作禮長跪 白天尊言 願示我等本師之處  
天尊告曰 我見世人貪味殺生 漁獵為事 飛鷹走狗 彈射飛鳥

## 太上洞玄靈寶十師度人妙經

清微藏書閣

斷絕眾生之命 死入地獄 億劫乃得出 生作蜚蠊蟲 朝生暮死  
坐其前世斷他命故 我見是故 斷不殺生 今得長壽不壞之身 是  
吾一師 我見世人私竊偷盜 負債不償 違忤逃避 死入地獄 億  
劫乃得出 生為驢畜中 身負諸重 加苦鞭打 後死人剝其皮 甚  
痛甚痛 我見是故 斷不偷盜 自然財寶 是吾二師 我見世人常  
懷嗔恚 沉毒相怒 結忿胸心 不離愁毒 死入地獄 而墮惡道  
億劫乃得出 生蝮蛇之中 我見是故 斷不嗔恚 得堅固力 是吾  
三師 我見世人貪慾奸淫 犯盜他妻 死入地獄 男抱銅柱 女臥  
鐵床 舉體焦爛 痛不可當 億劫乃得出 生黃門石女之中 經五  
百世 我見是故 斷不奸淫 常淨身心 是吾四師 我見世人兩舌  
鬥亂 說人長短 妄言綺語 誹謗彼此 令人君臣父母 朋友知識  
恩義疏絕 展轉無信 死入地獄 拔出其舌 洋銅灌口 億劫乃  
得出 生牛畜之中 但念水草 餘無所知 若得為人 生輒聾啞  
口氣腥臭 人見不喜 有所言說 人不聽受 我見是故 斷不兩舌  
是故 我今語聲八種 言成法律 一切天人 莫不樂聞 是吾五  
師 我見世人嫉妒勝己 爭競功名 嘖嗃彼此 無先讓心 死入地

獄 億劫乃得出 生邊夷之國 聾盲喑啞 有人之形 無人之情 我見是故 斷不嫉妒 是故 我今智慧如海 種種方便 諸妄無著 說法無盡 於大眾中最尊無上 猶如在於暗室 舉入炬火 除一切暗 是吾六師 我見世人貪酒嗜味 昏亂罵詈 去失正法 清淨道性 成就惡業 死入沸屎地獄 晝夜常見諸臭 億劫乃得出生 若得為人 狂聾心亂 永不得聞正法妙音 我見是故 斷不飲酒 是故 我今心如日月 照臨一切 幽暗皆令明了 是吾七師 我見世人積聚錢財 不肯施惠 兄弟妻子 都不給與 坐守而死 後生餓鬼中 飲水成膿 食飯成炭 我見是故 斷不慳貪 是故 我今飲食天廚 百味自然 是吾八師 我見世人自恃豪貴 輕慢孤老 試弄誹笑 後生卑賤 為人矬小 眾人輕試 還受其罪 死受惡報 是故 我今見諸貧窮 矬陋攣癖 諸根不具 為之悲傷 是故 我今得清淨妙身 光明第一 一切諸天人中 一切法中 更無及者是吾九師 我見世人不敬父母 不宗伯叔 不愛子孫 父母教誨言令不從 為子不孝 為父不慈 為兄不恭 為弟不順 為夫不信 為妻不貞 死入地獄 輪轉五道 無有出期 後生鱗螯之中 自

## 太上洞玄靈寶十師度人妙經

清微藏書閣

然化生 無有父母妻子眷屬 如是經一劫 乃得為人 生在邊夷 無禮義處 我見是故 勤心行道 七祖父母 皆得生天 是吾十師 吾行諸善 得六神通 見無量慧 得自在神通力 直至道場 說是語時 十方天人皆得真道 有諸魔王鬼等 皆見道跡 不可思議 時說正法 是諸神仙 亦得高真 爾時 仙人從座而起 頭足作禮長跪 白言天尊 今日大經 云何奉持 天尊說言 是為名 靈寶天尊神通變化十師度人妙經 當奉持之 若復有人擔負乾草入於大火 火不能燒 亦未為難 若復有人以崑崙山遠擲他方 亦未為難 若能讀此經 為人解說 則為是難 欲求神仙 亦當讀此經 欲求名聲高貴 亦當讀此經 欲求富貴長壽者 亦當讀此經 欲求與明師世世相值 亦當讀此經

此經尊貴 猛於我神 有能奉持書寫 讀誦是經之者 別見於我 我亦未現於汝 當令是人坐於道場 則與十方天尊 以手摩其頭頂 威神覆護 令無衰患 說是經訖 諸天龍神 及諸大眾 咸

聞正典歡喜 即共皆起 前進作禮 辭退而去

太上洞玄靈寶十師度人妙經竟

天運辛卯年酉月正一天師清微弟子洪鼎堅羅大英恭錄彙編  
鞠昕延複校

太上洞玄靈寶十師度人妙經

清微藏書閣